

Scola y vita

La scola ie vita, ma duta la vita ie na scola! Evaluazion tla scola



Ntan la prejentazion di resultac cumplessifs dl'analisa linguistica ai 5 de juni 2009 a San Martin de Tor.

Scola - L'evaluazion da dedora jirà inant, tl ann de scola 2009/2010, cun n program drët rich y de cualità che dëssa judé a valorisé la scoles de Gherdëina y dla Val Badia per ti vester nce manëcia ala deficulteies y ai bujëns atuei.

Stlù ju l'analisa linguistica dla 5a classes de scola elementera cun na pitla publicazion y nvië via n stude n con' dla cumpetënzes linguistiches tla scoles mesanes, mèter a jì l Cunvëni provinziël cun l president dl Invalsi Piero Cipollone ai 11 de dezëmber 2009 domesdi pra la fiera dla Furmazion Futurum a Bulsan, ti sté do ala proes naziuneles y nternaziuneles y nresci plu avisa coche la sta cun l'ufiarta furmativa tla scoles ladines y n.i., chëstes ie mé n valgunes dla ativiteies che toca pra l gran lëur dl'evaluazion da dedora.

I prim resultac

Nsci, do avëi prejentà ai 5 y ai 10 de juni 2009 i prim resultac cumplessifs dl'analisa linguistica, che ova purtà a lum n bel cheder de plurilinguism dassënn senti cun resultac de marueia da pudëi mustré su, iesen bele tl lëur de jì inant y de la stlù ju cun na pitla publicazion che unirà ora d'autonn via. N puderà mustré su duc i dac cun si particulariteies, ne desmincian nia i cunfronc cun la scoles elementeres talianes y tudëscas che à fat pea pra chësc proiet.

N se ova tët dant de analisé l livel scrit dla rujenedes: ladin,

tudësch y talian di sculeies y dla sculéas dla 5a classes de uni scola elementera de Gherdëina y dla Val Badia y de fé n pitl cunfront cun na pitla grupa de sculeies y de sculéas de rujeneda dl'oma tudëscia y taliana, per vester boni de mustré su l livel dla produzion scritta y nia mé dla cumprension di trëi lingas.

L valor dla rujenedes

I resultac dl'analisa linguistica à purtà pro a udëi ite l gran valor dla rujenedes y la mpurtanza dla preparazion che n à arjont, ma la professëura Rita Franceschini y Gessica De Angelis ti à nce dat ai/ala diretëures y ai nseniand y ala nseniandes vel' cunsëi per pudëi miuré l lessich sibe per talian che

per tudësch y te vel'cajo nce per ladin, che ti dà mo da cë a n valgun sculeies y a n valguna sculéas. De bon cunsëies cun directives profesciuneles y scientifiches n con' di aspec dl lingaz da cunscidré y n con' dla pruzedura de lëur cun metodologies desferëntes fej for plajëi.

Cunlaurazion cun l Zënter Linguistich

Nce chëst ann cialeràn de lauré cun l Zënter linguistich de Bulsan che ie lià al'Università de Bulsan-Persenon per nvië via n'evaluazion ubietiva y de cualità che sibe de utl per la scoles de Gherdëina y dla Val Badia.

L'evaluazion da dedora ne n'ie deguna valutazion de vel'diretëur o de vel' diretëura, di nseniand y dla nseniandes o de n sculé y de na sculea, ma la dëssa purté pro a na reflëscion plu sota n con' dla scoles ladines y de si daunì. Garanti la cualità ie uni di fins primers dla scoles di luesc ladins che cun si ufiarta furmativa à bele na bona fundamënta per arjonjer l suzes scolastich.

Ulësse mo tò l'ucajion per reingrazië duc chëi che à purtà pro a mèter a jì l'analisa linguistica y à judà a lauré ora i resultac.

Rosmarie Mussner



L president dl cumité reingrazia.